

周
易
正
解

周易正解卷二十

郝敬習

說卦

此篇亦夫子所作十翼之一。詳說諸卦象數之義也。
第一章

昔者聖人之作易也。幽贊於神明而生蓍。参天兩地而倚數。觀變於陰陽而立卦。發揮於剛柔而生爻。和順於道德而理於義。窮理盡性以至於命。

幽贊。猶言默相。神明。猶言神靈。生蓍。猶言作蓍。生者。自然之意。非人力也。猶大極生兩儀之生蓍。蒿草以

蒿爲筮策也。古聖人作易而圖書出。蓋神明默相之。聖人因以作著策。大衍之數所以生也。參天兩地。指伏羲始畫一也。一生爲奇。卽分二爲偶。中立曰參。附合曰兩。奇陽爲天。偶陰爲地。凡數皆奇偶相倚而生。倚猶因也。奇參偶中。偶兩奇畔。交相因依。曰倚。參兩倚爲五。五者圖書之中。六七八九以生。八卦以成。三百八十四爻。萬有一千五百二十之策。皆由此出。故數倚參兩也。然言參兩不言一。何也。數莫非一也。一非常住。一者元始也。元始虛无。无象无數。聖人欲設象作易。而虛无不可象。于是始畫一。一與虛无已隔。

不可以一卽虛无。故以大極名虛。而以奇名一象陽。要之一雖非虛。而象虛者莫如一。方其虛也。一亦无有。纔有一。卽破爲二。二一卽三。三二卽五。故一无獨成。奇生偶。隨相參。相兩生五。五者數之大宗。參兩者一之圓神。畫不外乾坤。數不越參兩。是故圖書之數五位相得。奇偶相依。天一地二。天三地四。天五地六。天七地八。天九地十。皆天地相倚而生。所謂參兩也。大衍之數。一與二倚。二與三倚。三與四倚。四與五倚。五與六倚。以至于七八九十。皆參兩也。卦三奇爲乾。三偶爲坤。乾坤往來生六子。六子往來生六十四陰。

來陽中爲偶。陽往陰中爲奇。皆參兩也。三畫爲下卦。兩其三畫爲重卦。錯八爲六十四。亦參兩也。筮策三三爲老陽。兩三爲老陰。二兩一三爲少陽。二三一兩爲少陰。亦參兩也。三畫之卦。初爲地。二爲人。三爲天。兩其三畫之卦。天地人三才各兼兩。莫非參兩也。故數不越參天兩地相倚。或者以奇圓圍三。陽用其全。謂之參天。偶方圍四。陰用其半。謂之兩地。夫圍三圍四。乃一三五之所生。非以生一三五也。奇圓內徑一。外圍三。是一生三。陽實外生之象也。今獨用外圍之。三而棄內之一。是陽亦未用其全也。偶方內徑一。外

圍四。是五抱一。陰虛內含之象也。今僅用外圍之半。而併棄中之一。又何取爲兩地乎。且謂之兩者。非地自兩也。參者。非天自參也。天地交。奇偶合。乃有參兩之名。蓋指圖書中五。包天地而言。易數之本也。觀變于陰陽而生卦者。謂三奇純陽爲乾。三偶純陰爲坤。乾一變而成震。再變三變而成坎。艮。坤一變而成巽。再變三變而成離。兌之類。諸卦皆自乾坤變。故曰。觀變于陰陽。以卦之全體言也。發揮者。發越揮散。謂卦爻剛柔。上下往來而成六位。以逐爻之細數言也。陰陽氣也。氣不可見。剛柔質也。質則有形。陽氣不可見。

畫爲剛爻以發之。陰氣不可見。畫爲柔爻以發之。氣
生質。陰陽生剛柔。卦生爻。蓋兩儀分而陰陽立。陰陽
變化而剛柔生。聖人觀其變化以立八卦之體。發揮
于剛柔以生卦中之爻。爻不越剛柔。卦不越陰陽。數
不越天地。易不越乾坤。乾坤不越易簡。故凡著數卦
爻。非強造也。非粗迹也。鬼神天地陰陽剛柔。皆道德
義理性命。而著數卦爻由此生。與一陰一陽之道。至
易至簡之德。相爲調和順適。非人爲之私也。條理于
義而得化裁之宜。窮乎萬事當然之理。盡乎人物自
然之性。以極至乎天道本然之命。蓋命者性之原。性

者理之原。恆人愛惡相攻。情僞相感。吉凶善惡紛然。淆亂。所謂百慮殊途。輾轉迷惑。遂失本初。聖人觀變。發揮。使學者擬議變化。以平其暴戾。覺其迷亂。理得則性復。而人與天合。天人合而易无餘蘊矣。此聖人作易本義。故說卦首推原道德性命仁義。以見易非象數著策之迹而已也。前言大極生兩儀。兩儀生四象。四象生八卦。自无而向于有也。此言窮理盡性。以至命。自有而還諸无也。

一陰一陽者。易之道。陰陽之間曰繼。參天兩地者。易之數。參兩之合曰倚。生生之謂易。未有陰陽不相倚。

而能生者。卦畫之始。得一而已。畫起一奇。卽分爲偶。奇偶相倚。卽成參兩。凡陰陽之數。一立則二分。而在外兩合。則一函而居中。陽倚陰。陰倚陽也。如人手指五中空。四虛實相倚。居然成九。卽圖書中五與爻位九五之象也。指實象陽爲奇。空間象陰爲偶。指爲參。空爲兩。兩者空間也。參者中立也。此亦足以明參天兩地之義矣。而說者謂三奇爲乾。謂之參天。三偶爲坤。謂之兩地。似也。然此自成卦以後。論乾坤。非自乾坤以前。觀參兩。是分二三以釋參兩。非合二三以成參兩也。三之爲參。非謂三卽是參。二之爲兩。非謂二卽

是兩一生卽成參兩參兩卽成五故曰得一萬畢成卦成爻舉在其中故夫一者靜虛之體也在人爲性在天爲命在事物爲理事物變化萬有不齊莫不各有當然之理各具于人物本來之性同出于大虛自然之天所以爲百慮一致殊途同歸也凡民情欲攻取營營亂性世道所以交喪聖人立卦生爻教人窮究事物之理以融其觚稜垂刺之迹理順則性定虛以應實靜以化動會萬爲一是謂盡性然性猶屬人耳我與人與物各一性以性接物未能忘性則猶未離人未達天窮理盡性以至于虛極靜篤无聲无臭

月易三角 卷二十一 三
與天載同神則性與天合乃至於命聖人作易立卦
生爻始畫一命象也參兩性象也倚數理象也皆所
謂設象以盡意也

和順道德理于義窮理盡性至于命此聖教所以與
二氏異也二氏言性命而不窮理不知道德仁義但
空一切以爲知常復命明心見性自謂于事理无礙
其實勉強差排如告子不得勿求莊生以不齊齊物
鹵莽滅裂无精義之功復命而不本諸性見性而不
根諸理强事以從心拂人以貪天卒至毀常滅倫而
不可用也故聖學在致知格物物格而后知至則心

意與天下國家通而天人性命一貫故易者格物致知之學也

此章之言由粗入精由著策而卦爻而道德義理性命始性命而終著策由著策以學易非本著策生易也朱子遂謂易卦皆生于著引龜策傳云天下和平則蓍草生然則伏羲未作卦以前地不產蒿邪迂且舛矣

第二章

昔者聖人之作易也將以順性命之理是以立天之道曰陰與陽立地之道曰柔與剛立人之道曰仁與義兼

三才而兩之故易六畫而成卦分陰分陽迭用柔剛故易六位而成章

昔者聖人作易非強造也將以順人性天命自然之理也性命之理著于三才三才之道非兩不立道必有與而後成兩天有二氣曰成物之陰與施生之陽是以兩立天道也地有二形曰順承之柔與持載之剛是以兩立地道也人有二性曰愛惠之仁與斷制之義是以兩立人道也三才之道性命之理也道兼兩則變化行三才皆兼其道皆兩所謂一陰一陽者非天獨陽地獨陰也三才皆一陰一陽故聖人作易

兩其三爲六畫而成一卦。初二爲地。三四爲人。五上爲天。所以兼三才也。天有陰陽。地有柔剛。人有仁義。所以兩之也。分二四六爲陰。初三五爲陽。或剛往柔來。或柔往剛來。迭相爲用。錯雜而成文章。以盡陰陽之情。成一卦之用。亦猶地承天施。發生斂藏。惟其時耳。聖人本此作易。順性命之理。所以仁義迭用。經緯人道。而參天兩地。在其中矣。故易者。三才之道。非著數卦爻之跡而已。

天一氣耳。陰陽二氣。盈虛消息之類是也。地聚爲形。剛柔成形。高下平陂之類是也。人生有性。仁義成性。

好惡刑賞之類是也。所謂幽明之故、生死之說、鬼神之情狀，皆不外此。大抵三才統于天道，統于陰陽。剛柔者，陰陽聚而爲形。仁義者，陰陽繼而成性也。天道本陽，而陰爲之始；地道本柔，而剛爲之質。人道務義，而仁爲之心。參之爲三，兩之爲六，合之惟一。兼三才而兩之者，謂非分析而兩也。世儒分析爲兩，而弊且支離矣。

繫辭論易歸重于守位正民，曰：「仁義說卦歸重人道。」亦曰：「仁義可知，聖人作易本意，而豈卜筮云乎？」程正叔謂知易莫如孟子，亦以其言仁義也。

第三章

天地定位。山澤通氣。雷風相薄。博水火不相射。石八卦相錯。數往者順。知來者逆。是故易逆數也。

此章序八卦之象。以明重卦之義。卦凡八而已。六十四者。八之別也。每八加八。是爲八八。無所謂六十四也。說見繫辭上篇大極章。蓋易者。陰陽之氣摩盪而生變化。故曰天地設位而易行乎其中。聖人作卦以象之三奇而乾爲天。三偶而坤爲地。天高地下。乾坤定位。此易之門也。地有山澤。乾九三與坤六三往來其氣相通。所以象之而爲艮兌也。天有風雷。乾初九

與坤初六往來相薄。所以象之而爲巽震也。天地之中氣爲水火。乾九二與坤六二往來不相射。所以象之而爲坎離也。天地之間六氣同運。使乾坤位而陰陽不交。六子分而剛柔不和。則變化不行。易不可見。是以聖人于八卦之上。各以八卦挨次錯磨。往來周流。而三才之變形矣。然伏羲之錯八卦也。爻位皆自下而上。文王之序六十四卦也。各卦又自上而反下。何也。天地之間。往來而已。八卦相通。相薄不相射。相錯往來之象也。往來相倚。順逆相因。自上下來曰順。自下上往曰逆。陽自下起。圖書履一入上達天。故易

數皆由下生也。自下往上本逆而由初適二由二適三其數則順也。自上來下本順而三先二來二先初來其知則逆也。蓋內外體用遠近之數自此往而吉凶悔吝得失之兆自彼來。雖往與來有二象而順與逆非二機。往之所至卽來來之所過卽往。往以致其來數以探其知。逆以迎其順。未有往而不來來而不往者是故乾坤生六子皆自下而上造化以往屈而致來伸也。卦爻六位皆自下而上。易以彰往而爲察來也。事未來而吉凶悔吝先知則不迷于所往。此聖人畫卦作易之本義也。

天地山澤解見後八卦之象。乾坤純體奇偶无交。故曰定位。艮與兌交。故云通氣。震與巽交。故云相薄。坎與離交。故曰不相射。通之言貫也。山與澤一高一下。水脉灌注。其氣相貫通也。薄之言迫也。雷與風一動一入。氣合而勢相迫也。射之言蝕也。侵害之意。水與火一寒一熱。似相侵而下。燃上沸以成。既濟不相射也。相薄不相射。語意互見。雷風似相薄而相合。水火似相違而不相射。坎離得天地之中。急人生之用。故易序二卦居中。以既未濟終焉。此章亦首乾坤終坎離也。

觀此章之言重卦自義聖愈明矣。天地山澤風雷水火者三畫之象也。八卦相錯者錯爲六畫也。諸卦皆天地山澤風雷水火八者之交錯。故卦惟有八耳。如一乾爲體而坤艮兌震巽坎離錯其上皆乾也。一坤爲體而乾艮兌震巽坎離錯其上皆坤也。餘六皆然。故曰八卦相錯。或謂專指三畫非也。磨石曰錯。相錯猶相磨也。圖詳于後。



化機无停。不越往來。天地古往今來。日月晝往夜來。四時暑往寒來。人物生往死來。萬事萬物新新非故。恆久不已者。惟其往來耳。所以變動不居而爲易。故

曰一陰一陽之謂道。聖人設爲卦爻以象之。乾坤者陰陽之象也。六子相通相薄相射。八卦相錯者往來之象也。順逆者此往彼來相迎之機也。數者往之所歷也。知者來之所報也。不言易順理而言易逆數者。聖人憂患貴知來也能知來則能利往是故知往而不知來能順而不能逆者凡民也。故凡卦爻所言吉凶休咎善惡邪正未見其形先知其理故曰逆逆者順之所合也。首章言順道德次章言順性命易簡自然物皆同也。惟其習而不察則知往而不知來故聖人教以逆數使之知來如坤初六履霜馴致其道龍

馬疑天地戰。臣弑君。子弑父。皆以其順而不知逆。往而不知來也。故文言曰。非一朝一夕之故。蓋言順也。聖人作易。以前民憂患。以知來。觀變立卦。發揮生爻。參伍錯綜。鉤深致遠。爻以正而求變。卦以順而反倒。莫非逆數。教人順道德性命之自然也。其理本順。其數則逆。非能拒其來。而能不迷其往。故君子行所无事。樂天循理。順也。其操心慮患。朝乾夕惕。逆也。故夫昏迷放佚者。順之失。反身克己者。逆之功。蓋自大極分爲儀象。吉凶善惡。日遠于初。聖人原始要終。窮理盡性。以至命。精義入神。以知化。未覩其器。先見其象。

因器會道因象會意百慮反于一致殊途要于同歸
皆所謂逆也是以聖人知幽明之故知生死之說通
乎晝夜之道而知元亨利貞利有攸往而和順于道
德性命之自然也

八卦相錯之圖




錯震

離震	巽震	艮震	坎震	震震	坤震	乾震	兌乾	離乾	巽乾
噬嗑	益	頤	屯	震	復	无妄	夬	大有	小畜


錯坎


離坎	巽坎	艮坎	坎坎	震坎	坤坎	乾坎	兌坤	離坤	巽坤
未濟	渙	蒙	坎	解	師	訟	萃	晉	觀

錯艮



錯巽





右八卦相錯其名六十四其實八耳故聖人但言八卦未嘗言六十四卦六十四者亟數其物耳況謂六十四上復加爲六十四此莊周所謂孟浪之言矣

八卦往來之圖

乾 ☰ 天定位

坤 ☷ 地定位

泰否

初乾震 ☳ 雷

中乾坎 ☵ 水

終乾艮 ☶ 山

初坤巽 ☴ 風

中坤離 ☲ 火

終坤兌 ☱ 澤

相薄恆益

不相射既濟未濟

通氣咸損

易卦乾坤而已。乾坤立而天地位交相往來。是生六子。雷風者天之氣。山澤者地之形。水火者天地形氣之中。故六子皆乾坤化生也。獨陽不生。獨陰不生。乾

坤交而後六子生。獨往不交。獨來不交。往來相迎而後其交成。合二卦觀之。乾往坤初。坤來乾初。是爲震。巽乾往坤中。坤來乾中。是爲坎。離乾往坤終。坤來乾終。是爲艮。兌分二卦觀之。乾往坤初。則爲震。乾又進往坤中。則坤來乾初。爲坎。乾又進往坤終。則坤來乾中。爲艮。坤往乾初。則爲巽。坤又進往乾中。則乾來坤初。爲離。坤又進往乾終。則乾來坤中。爲兌。此往則彼來。彼來則此往。自此往彼。自初往終。謂之順。自彼來此。自終來初。謂之逆。暑往寒來。寒往暑來。日往月來。月往日來。人物所以生成。世變所以廢興。皆由此未。

有獨往不來獨來不往者不往无以致來不來无以成往不往不來无以成造化故曰往者詘來者伸尺蠖之詘以求伸尺蠖不詘不得伸造化不往不得來往來相迎故曰逆逆者迎也往來者相迎之象也文王演卦一正一倒前卦順而下來後卦逆而上往皆所以極往來之數窮順逆之變故曰數往者順知來者逆易逆數也聖人作易彰往察來其象如此

泰否咸恆損益既濟未濟此八卦者乾坤六子之正交也爲上下二篇序卦之要領上經首乾坤天地定位歷十卦奇偶各三十畫而遇泰否泰否者天地之

大運也。下經首咸恆。山澤通氣。風雷相薄。亦歷十卦。奇偶各三十畫。而遇損益損益者。人事之大分也。上經首乾坤終坎離。坎離成乾坤之能。乾坤定位。故坎離不交。下經首男女終既濟未濟。水火極生人之用。男女交。故水火亦交。既濟復變爲益。未濟復變爲損也。大抵德莫大于天地。功莫大于水火。故上經三十卦。言天地陰陽。而水火居多。下經三十四卦。言六子五行。而山澤風雷居多。夫子此章之言。提挈其旨。明易道大綱。學者習而不察耳。

宋邵雍氏援夫子此章之言。撰圖名先天卦位伏羲

之易對待之體也。又援後章帝出乎震撰圖名後天卦位文王之易流行之用也。夫對待流行有兩名。非兩時兩事也。況可分爲兩易乎。有體卽有用。不用則體爲頑質。有對待卽有流行。不流行則對待爲偏枯。易道圓融。此際豈容分先後。今據夫子之言。第云天地位未嘗言乾居南。坤居北也。第云山澤通氣。未嘗言山居西北。澤居東南也。第云雷風相薄。未嘗言雷居東北。風居西南也。第云水火不相射。未嘗言離居東。坎居西也。所謂通與薄與射。謂二氣變化相資。非謂其位相對。而後見其相通相薄不相射也。子云。

生于午。極于子。以爲自然。苟非斷震巽倒湊。則一切不合。論其序。旣謂震居四。論其數。又自震起。將誰適。從如以震爲一陽。冬至十一月當復。六十四卦分直。周歲則每月五卦有奇。乃均。今自冬至復。一陽起。歷震過離至臨。凡十七卦。乃遇二陽。爲十二月。而春分又當臨。則是十二月春分也。自臨至泰。九卦。遇三陽。爲正月。而立夏當泰。則是正月立夏也。自泰至大壯。五卦。遇四陽。爲二月。而芒種當大壯。則是二月芒種也。自大壯至夬。僅三卦。遇五陽。爲三月。而芒種仍在夬。自夬至乾。僅一卦。卽遇純陽。爲四月夏至矣。自乾

至姤亦僅一卦卽遇一陰生爲五月而夏至仍在夬
自姤歷巽過坎至遯凡十七卦乃遇二陰爲六月而
秋分當遯則是六月秋分也自遯至否九卦遇三陰
爲七月而立冬當否則是七月立冬也自否至觀五
卦遇四陰爲八月而大雪當觀則是八月大雪也自
觀至剝僅三卦遇五陰爲九月而大雪仍在剝自剝
至坤僅一卦卽純陰是爲十月而已冬至矣夫陰陽
之初生其來何緩其卦何太疎及陰陽將極其去何
速其卦何太密諸節氣與月令大相舛忤何得謂之
自然就使一一脗合聖人作易豈專爲配時令探節

候而況未必合也。又以各卦名義推之。頤屯益何取于小寒。噬嗑隨何取于大寒。无妄明夷何取于立春。既濟家人何取于雨水。豐離革何取于驚蟄。同人臨何取于春分。由此推至二十四氣與卦名義皆无涉。又何其支離也。據經傳所論八卦次第。未有以坤終者。蓋乾坤父母一陰一陽理无離析。而首乾終坤則自邵氏圖始。若謂卦爻有消息。但依第九章三索始乾至震而四變成坤。由坤至巽而四變復乾。往來循環。乃見自然。故各章取象皆以陰陽三畫純卦初中終爲序。甚明。今以順逆之說牽合圓圖。另以坤終。豈

勝謬乎。至于方圖尤爲伎倆。云天地定位。否泰及類。山澤通氣。咸損見意。雷風相薄。恆益起意。水火相射。既濟未濟。四象相交。成十六事。八卦相盪。爲六十四。其法從四角遙對。交股至中央。西北角乾。東南角坤。爲定位。對東北角泰。西南角否。爲及類。兌次乾。艮次坤。爲通氣。對次否之咸。次泰之損。爲見意。離次兌。坎次艮。對次損之既濟。次咸之未濟。震次離。巽次坎。對次既濟之益。與次未濟之恆。共爲十六事。如人以三十二棋子。排八陣圖。爲嬉局。何當于用。又以方圖寫入圓圖內。謂爲天圓地方。天包地外。尤疎淺可笑。天

地定位一章謂本圓圖雷以動之一章謂本方圖若是則經當云乾以君之兌以悅之日以恒之雷以動之風以散之雨以潤之艮以止之坤以藏之其序始合卽合又何所據而知其本爲圖也皆安排造作无補經義而朱元晦極相推服以爲易開卷第一義姑贅愚見于此俟後之讀者參焉

第四章

雷以動之風以散之雨以潤之日以恒恒上之艮以止之兌以說悅之乾以君之坤以藏之

上章言八卦之象聖人所以重卦之義此章卽象言

八卦之用。與下二章皆以造化明易也。天地之間。游氣紛擾。孰非動也。動莫如雷。陽氣一奮。則蟄起萌達。鼓天下之動者。震之用也。羣分布列。孰非散也。散莫如風。巽命一申。則聲聞四達。宣天下之滯者。巽之用也。有形之類。資濕而化。雨所以爲濕。滋潤羣生。坎之用也。含氣之類。得暖而生。日所以爲暖。烜燠羣生。離之用也。凡此動散燥濕之氣。不止則不成。艮所以止之。使性命各正也。不悅則不和。兌所以悅之。使美利順成也。六者。无以君之。則亂。乾爲天。所以統元氣。主施而君之也。无以藏之。則洩。坤爲地。所以載萬類。主

受而藏之也是故八卦之用與造化同流自動至恒
物之出機自止至藏物之入機動與散盡天下之變
潤與恒盡生物之功故四卦以造化言而稱象止以
厚終兌以要成天以資始地以資生故四卦以人事
言而稱德雷動風散乾坤初交爲震巽也雨潤日恒
乾坤中交爲坎離也止之說之乾坤終交爲艮兌也
乾坤父母故終之邵氏撰爲方圖謂雷風從中起一
往西北一往東南于義奚取

震本乾陽乾戰于西北歷坎至艮收斂密藏然後一
陽奮于重陰之下動不可禦故象雷巽以二陽在上

微陰浸入于下。陽順而不覺其來甚微。其末漸大。柔而有力。故象風。坎以陰受陽氣。化濕中滿外弱。其質爲水。故象雨。離以陽含陰精。內虛外朗。其質爲火。故象日。艮居冬春之間。將動未動。如人閉息凝神。堅忍握固。蓄極未通。故其德爲止。象山兌以一陰上出。據二陽之頂。如人容貌天好。露于頭面。蓋陰性柔媚。五臟之精華。血脉之浮榮。上達于面孔。故其德爲悅。象澤。乾陽資始。主宰萬化。故曰君。坤陰順承。持載萬有。故曰藏。藏者。歸根復命之義。故夏易以坤爲歸藏。

第五章

帝出乎震。齊乎巽。相見乎離。致役乎坤。說言乎兌。戰
乎乾。勞乎坎。成言乎艮。萬物出乎震。震東方也。齊乎巽。
巽東南也。齊也者。言萬物之潔齊也。離也者。明也。萬物
皆相見。南方之卦也。聖人南面而聽天下。嚮明而治。蓋
取諸此也。坤也者。地也。萬物皆致養焉。故曰致役乎坤。
兌正秋也。萬物之所說也。故曰說言乎兌。戰乎乾。乾西
北之卦也。言陰陽相薄也。坎者。水也。正北方之卦也。勞
卦也。萬物之所歸也。故曰勞乎坎。艮東北之卦也。萬物
之所成終而所成始也。故曰成言乎艮。

此章言八卦之氣周流于天地之間。四時八方。无往

非卦所謂兩儀四象生八卦之道也。以兩儀論則乾坤爲天地。以八卦論則乾坤與六子皆各一其用。帝者陰陽不測之神。造化之主宰也。帝始出爲震。旣出而齊爲巽。出齊相見爲離。相見必有所需而致役焉。爲坤。役成則說。說以言其爲兌也。說極則懼而戰戰則爲乾。戰而息則勞。勞則爲坎。勞乃有成。成以名其爲艮也。何謂帝出乎震。帝者萬物之命。八卦之神。四時五氣莫非帝德而震東方也。斗柄東指陽和初動于時爲春。于氣爲木。一陽奮于二陰之下。羣生振作。帝德初布。故曰出乎震也。巽次震。位東南。萬物出震。

至巽始齊。莫春初夏之交。物美少鮮潔整齊。故曰齊。
手巽離次巽南方之卦。于時爲夏午火文明嘉會亨。
通物齊出者至此相見。聖人所以必南面聽治。背暗
向明。蓋取諸此。故曰相見乎離。坤地也。次離于時爲
季夏中氣土盛。離火將退。物相見畢。華落漸實。長養
成就。正惟夏秋之間。各資于土。營營役役。然故曰致
役乎坤。兌次坤西方之卦。于時正秋。火土氣盛。鎔結
生金。金氣快利響亮而光澤。萬寶秋成。美利順遂。物
所悅也。故曰說言乎兌。乾次兌西北之卦。物自東來。
木火土諸陽氣盡矣。十月之交。地氣下降。天氣上升。

西北天高氣肅。金水之間。寒涼凜烈。百蟲蟄。草木穢。生死交。萬物復命。陽陰相迫。是以戰也。故曰戰于乾。坎次乾。于時爲冬。物自震出。一歲之中。六位屢遷。養育勤劬。至此保合安貞。歸于其宅。禮歲終蜡。以息老物。休田夫。國養老。皆所以勞之也。故曰勞乎坎。艮次坎。居東北。冬春之交。水生木。而艮居中爲土。以一歲論。夏秋之間。火金遇克。无土。則火烈而金不斂。以再歲論。冬春之間。水木相生。无土。則水淫而木不生。西南坤土制火。生金。東北艮土制水。生木。其德爲止。水遇土止也。朔氣嚴寒。得土冲和。含育以達于震。而復

東出所謂成始成終艮之功也故曰成言乎艮凡此
 八卦天地四時之氣周流不息聖人作卦以德行氣
 運配合未嘗以畫數爲增減甚明也義文周孔之意
 正同不知邵氏何據獨以此爲文王之易而強名後
 天也

八卦方位



伏羲畫卦未言方位。文王演易發方位之說。坤云。西南得朋。蹇云。不利東北。是也。文王卽演義聖之旨。夫子卽據文王之意。卦位惟此爲定論。別无先天乾南坤北之說。

八卦木金土各二者。以位偏勝也。水火各一者。以氣正中也。中則一。偏則兩。坤陰土。故居陰方。艮陽土。故居陽方。震陽木。故正東。巽陰木。故近南而接陰。兌陰金。故正西。乾陽金。故近北而接陽。春爲木。夏爲火。夏而秋。則火克金。遇坤土。則是火生土。土生金。克者又順以相生。秋爲金。冬爲水。冬而春。則水生木。遇艮土。

則是木克土。土克水。生者又逆以相克。土金順而相生。所以爲秋之克也。木土逆而相克。所以爲春之生也。生生克克。造物人事。成毀相因。理无不然。八卦或言象。或言時。互見也。

天爲生物之祖。故帝自東出。而居本西北。天體西北。最高。陽氣輕清。當金水之間。金革舊。水化新。故天生坎水。而艮土止之。以東出于震巽。順也。東南卑下。受西北之委。震木生巽風。南遇離火。順之極也。故風火爲家人順也。火盛于夏。萬物盛大。積爲崇壤。土得母助。煅煉生金。至兌萬寶西成。富而悅。利而和。功成。

復命居天地之間故悅也。周禮六官辨方正位取諸此。

土所以旺于四季者。土本中和氣也。四季交合之間。東南木火。西南火金。西北金水。東北水木。其間生中氣。其交生和氣。中和生土氣。非塊然之謂土也。惟西南坤方。離火兌金交。金氣收斂。東北艮方。坎水震木交。木氣發生。二時土氣最盛。故坤與艮皆土。而坤土又當四時正中。其氣尤甚。坤土得母。故斂舍而成金。艮土得妻。故發生而爲木。

以人身論。震一陽初生。如胎孕方動。詩云。載震載夙。

震者。娠也。巽如嬰兒既生。幼而徇齊也。離如十五志學。聰明開朗也。致役坤。如載贄出疆。經營四方也。說乎兌。如獲上治民。得時行道也。戰乎乾。如老成諳練。保全末路也。勞乎坎。則懸車告老矣。成乎艮。則百年期盡。有子傳家矣。

人世營營。不離地上。資生利養。无過于土。故役乎坤。兌秋爲金。金性銛利。痛快。凡人含殺氣。則多笑笑哭。皆金象。故秋氣肅而主悅。乾德剛。物老則剛。人老則憂。位高則危。故戰乎乾。勞之言安也。坎水外暗。中明。如日之夜。陽閉于陰內。如人晝疲夜寢。退藏休歇。勞

者勞之故曰勞乎坎艮止也。欲動不動曰止。舊者已終。新者將始。如五穀果實含氣堅栗。故曰艮如人屏息堅忍。憑極而生震也。

前此論卦皆主乾坤。今以乾坤并六子言。何也。蓋論八卦之象。乾爲天。坤爲地。天地爲六子所宗。論八卦之用。坤養爲德。乾戰爲威。威德亦八卦之一事。易道變通。如後章廣八卦之象。雖一馬一牛皆乾坤也。學者不達而邵氏因爲長男長女用事。父母退居之說。亦鑿也。

乾坤有至大之德。故无專用之位。二卦純體无交。則

不成變化。坎離爲天地交之中。據正位。分司南北。故天地之真炁莫如木火。功用最大。純坤可以和火。金之亢厲。純乾可以化金。水之清嚴。故秋夏之間。土氣盛。而秋冬之交。天氣肅。自然之運也。又天體西北最高。故爲乾戰之鄉。地勢東南最下。水就木旺。過此以往。西南地勢廣平。火資土。故坤居焉。人形體手足用事。居左右。乾坤二隅之象也。人事物理善用者必藏成功者不居。易道固爾。禮家鄉飲位皆四隅。祭祀室事東向。陰厭西南。陽厭西北。皆法乾坤也。

坤以藏之。又致役致養焉。何也。養所以藏也。役所以

養也。萬物以養爲歸。以役爲養。物自春夏以來。動順
向明。氣機飛揚。至是帖然平夷。各思安身立命之地。
委體服役。成就于坤。物至秋而收。其象如此。坤道順
承。亦役養義。古者卒謂之養。廝謂之役。百昌卑服于
地。役役然自養。所以藏也。故曰龍蛇之蟄。以安身。商
易以坤爲歸藏。此也。人能常養冲和之氣。體坤之德。
不出吾宗。致役在此。致養在此。歸藏在此。坤九五云。
黃中通理。正位居體。美在中。而暢于四肢。發于事業。
此之謂也。

第六章

神也者。妙萬物而爲言者也。動萬物者。莫疾乎雷。撓闢萬物者。莫疾乎風。燥萬物者。莫熯乎火。說悅萬物者。莫說乎澤。潤萬物者。莫潤乎水。終萬物始萬物者。莫盛乎艮。故水火相逮。雷風不相悖。山澤通氣。然後能變化。旣成萬物也。

上章八卦以氣言。則乾坤亦各司一氣耳。此章以道言。則乾坤卽是陰陽不測之神。故天地定位而易行乎其中。神之爲也。神不可見而萬物之可見者。莫非神不物而能物物。故曰妙萬物而爲言也。動萬物者。莫速乎雷。雷亦不知其所以爲動。撓萬物者。莫急乎

風風亦不知其所以爲撓燥萬物者莫熯乎火火亦不知其所以爲燥說萬物者莫說乎澤澤亦不知其所以爲說潤萬物者莫潤乎水水亦不知其所以爲潤終始萬物者莫盛乎艮艮亦不知其所以爲終始皆陰陽不測之神乾坤交而生變化也是故中交而水火相逮然後能潤燥初交而風雷不相悖然後能動撓三交而山澤通氣然後能說成所以能變化而旣成萬物故曰神也者妙萬物而爲言者也

神卽前章所謂帝也帝以有主言神以不測言雷風火澤水艮卽氣以言神也莫疾莫熯莫說莫潤莫盛

相逮不相悖相通言神之不測也艮獨不言山者成物之始終非山所能盡也前章言雷風相薄水火不相射此章言水火相逮雷風不相悖意互見也雷風相薄而不相悖水火不相射而相逮也夫子于八卦方位後復舉神妙萬物言者恐人溺于象數方位而示以易簡之要也世儒守著策卦畫與聖意相左矣○按水火相逮雷風不相悖山澤通氣此邵朱所謂伏羲先天對待之體動撓潤燥等所謂文王後天流行之用今觀夫子此章通融一貫何嘗有體用先後之別

第七章

乾健也。坤順也。震動也。巽入也。坎陷也。離麗也。艮止也。兌說也。乾爲馬。坤爲牛。震爲龍。巽爲雞。坎爲豕。離爲雉。艮爲狗。兌爲羊。乾爲首。坤爲腹。震爲足。巽爲股。坎爲耳。離爲目。艮爲手。兌爲口。

此言八卦性情而擬其象。亦以釋二篇內爻象之例也。後倣此。乾純奇。奇者一也。一則直而不屈。乾三畫皆一。以至重六亦一。不屈之至也。故爲健。偶者二也。一則分而不專。坤三畫皆分。以至重六亦分。不專之至也。故爲順。震者一奇在二偶之下。陽剛好進奮作。

而上起故爲動巽者一偶在二奇之下陰柔始生潛
長而浸透故爲入坎者一剛居二柔之中爲陰所沒
故陷離者一柔居二剛之中順而附麗故離艮以剛
拒二柔之外无所復往故止兌以柔乘二剛之上順
而外見故悅此八卦之性情也識其性情以擬其象
无往非卦矣遠取諸物健行莫如馬乾象也順服莫
如牛坤象也變動莫如龍震象也棲伏莫如雞巽象
也負塗莫如豕坎象也華麗莫如雉離象也防禦莫
如狗艮象也和說莫如羊兌象也近取諸身首昂居
上乾之健也腹虛含納坤之順也足在下以身行震

之動也。股下有隱穴，巽之入也。耳虛內通，坎之陷也。目睛外朗，離之麗也。手能握固，艮之止也。口能言笑，兌之說也。觸類而長，則一卦不必當一物，一物不必主一卦。道不離陰陽，器不離剛柔。象事知器，其變无定。其通不窮，其神不測。安往非八物之流露，可以知易矣。其序皆始乾坤，次長男長女，次中男中女，次少男少女，由純歷初中終，次第井然，烏有所謂先後天也。

動陷止皆陽之剛也。入麗說皆陰之柔也。剛則能動，柔則能入。剛遇柔則陷，柔遇剛則麗。剛者始動而終

于止彖者始入而終于悅陽動在得所止陰入在得
所悅馬陽物故蹄圓牛陰物故蹄拆陽病則陰勝故
馬疾則卧陰病則陽勝故牛疾則立馬起先前足卧
先後足牛起先後足卧先前足亦健順之象也龍東
方之宿震東方也故象龍豕性喜水詩云有豕白蹄
燕涉波矣故澤謂之豬如書禹貢彭蠡既豬豕亦曰
豬小者曰豚中孚之澤取象豚魚江豬也人家畜豕
亦喜泥澤氣相類也牟多聲故有說象人首會諸陽
爲乾腹藏衆陰爲坤足主下六經爲震手主上六經
爲艮斂足正股雷風不相悖也收視返聽水火相逮

也屏息握固山澤通氣也

第八章

乾天也故稱乎父坤地也故稱乎母震一索而得男故謂之長男巽一索而得女故謂之長女坎再索而得男故謂之中男離再索而得女故謂之中女艮三索而得男故謂之少男兌三索而得女故謂之少女

此卽男女化生以象八卦往來之序亦以釋二篇中稱男女之義也卽義聖成卦本法非如邵氏根榦枝葉層累之說也一二三索皆自下而上所謂易逆數知來數往卽此可推六子稱男女陰陽之分也乾三

奇純陽天道也。萬物資始故稱父。坤三偶純陰地道也。萬物資生故稱母。父母合陰陽交奇偶相求。六子自此生。震坎艮三爲少陽父之男也。而皆資形于母。巽離兌三爲少陰坤之女也。而皆資氣于父。震者乾初以一奇索于坤而得故謂長男。巽者坤初以一偶索于乾而得故謂長女。坎者乾再以中一奇索于坤而得故謂中男。離者坤再以中一偶索于乾而得故謂中女。艮者乾以終一奇三索于坤而得故謂少男。兌者坤以終一偶三索于乾而得故謂少女。卦稱男女明由乾坤生也。在人爲男女。在物爲牝牡。莫不有

父母莫不有少中長之分。變化所以成而往來屈伸。寒暑晝夜相推之道。皆觀象可知。易道所以變動周流。屢遷不定。不可爲典要也。如邵氏橫圖。則諸卦木強而不可動。牽掣而不可移。烏觀此圖。融活潑不滯之妙理乎。朱子顧以彼爲本義。以此爲揲著求爻。則謬矣。夫揲著求爻。安得有此往來次序。不待知者而知也。

八卦相

乾父

乾一索 震長男

乾再索 坎中男

乾三索 艮少男

主之序

坤母 ䷁

坤一索 ䷁ 巽長女
坤再索 ䷁ 離中女
坤三索 ䷁ 兌少女

伏羲始畫一爲奇以象乾卽畫二爲偶以象坤分奇爲偶者兩不離一陰不離陽一奇成卽一偶隨一奇一偶成三爲乾三奇則三偶隨爲坤乾坤交皆以一陰一陽自下而上三男本皆坤乾以一陽往而致其來三女本皆乾坤以一陰往而致其來蓋乾坤畫雖各三而厥初惟一得一而參兩倚三才立八卦成故其往來惟一。是故乾三者奇偶之合也坤三者承陽

之數也。父純奇爲三，男各一奇二偶爲五，三五皆陽也。母純偶爲六，女各一偶二奇爲四，四六皆陰也。三男畫共九，三女畫亦九，男九畫偶又藏六，共成十五陽也。女九畫偶又藏三，共成十二陰也。父母奇三偶三，偶又舍三亦九也。三男畫共九，三女畫亦共九，男女共十八，二九也。偶又藏九，三九也。故三五九者皆陽兼陰，所以妙易之用也。偶舍二，女舍四，母舍六，卦舍八，此二四六八者皆陰隨陽，所以藏易之體也。皆所謂參天兩地相倚，一陰一陽之道。凡圖書之數皆已預備于八卦之中，此義聖始畫之明法。夫子開示。

之要旨。後世造爲先天等圖。稂莠亂真。不可不辨也。
○參天兩地。倚數觀此章。尤明參爲乾。兩爲坤。乾往
索坤。是謂天參地。坤往索乾。是謂地兩天。六子所以
生八卦。所以成萬象。所以出也。

第九章

乾爲天。爲圓。圓爲君。爲父。爲王。爲金。爲寒。爲冰。爲大赤。
爲良馬。爲老馬。爲瘠馬。爲駁。博馬。爲木果。

此以下推廣八卦之象。以見易道至變。无往非卦事。
事物物皆可以占。亦卽二篇內爻象之例也。乾以象
天。匪獨天也。天體圓。陽動而旋。凡圓皆乾也。君尊如

天君卽乾也。父生資始父卽乾也。物至剛而精純者莫如金玉。金玉亦乾也。戰乎西北。天高氣肅。寒亦乾。冰堅亦乾也。凡色之類。大赤爲陽光。如日火之色者。亦乾也。在物爲馬。乾馬健。故良馬亦乾也。爲老馬。象老陽也。爲瘠馬。肉少而骨立。象剛也。駁馬毛蒼色。斑駁如錢。圜象星文。亦乾也。木果圜而含生氣。大始之象亦乾也。由此以推何物无乾。寧獨天邪。或者疑八卦之象于經不盡合。正不必盡合。推而廣之。使學者通其意而象不可勝窮矣。

駁馬卽世所謂連錢駝。色青白有斑點如鱗。一名驪。

凡詩云皇駁其馬。舊解駁白曰駁非也。駁文如癰樹皮有癰文者亦稱駁。詩云隰有六駁是也。駁雜反純乾之變象。或云駁猛獸鋸牙食虎。謬也。六經鳥獸草木皆取目前至近貴人易知耳。

坤爲地爲母爲布爲釜爲吝嗇爲均爲子母牛爲大輿爲文爲衆爲柄其於地也爲黑。

坤順故象地。資生故象母。推而廣之布陰功其幅隕寬平亦坤也。釜虛而熟物致養亦坤也。凡吝嗇不能施靜翕之象亦坤也。凡物普均動闢之象亦坤也。犢牛隨母順象亦坤也。大車之箱方而載重亦坤也。六

偶彬彬文亦乾也。分爲十二衆亦坤也。凡形器之物有柄可執不能自運轉者皆坤也。地有五方其色各異。坤陰幽暗于地爲黑。由此推之无物不可象坤。何獨地邪。

震爲雷爲龍爲玄黃爲專夫爲大塗爲長子爲決躁爲蒼筤即竹爲萑完葦其於馬也爲善鳴爲鼻註足爲作足爲的穎其於稼也爲反生其究爲健爲蕃鮮。

震象爲雷爲龍不獨雷與龍也。坤之上六龍戰于野其血玄黃。天玄而地黃。震者天地初交故玄黃亦震也。草木之華有藪上承衆葉如陽承陰亦震也。大塗

通而无壅亦震也。父有長子亦震也。凡決裂躁急皆震也。春草易生蒼筤然如竹與葦下盤結而上虛脆亦震也。蒼筤猶言蒼涼蒼青色筤竹蔭蕭疎之狀象二陰在上而虛也。其於馬也發聲善鳴者亦震也。後視其左足白者一陽在東之象亦震也。凡馬後右足白曰驤左足白曰驥其足作起者下健之象亦震也。前視其額中白如射侯之的者微陽之象亦震也。其于稼也苗旣稿而根復生陽在下之象亦震也。一陽初動其究爲乾行而健方春百物蕃育鮮明皆震也。何物无震豈獨雷與龍邪。

巽爲木爲風爲長女爲繩直爲工爲白爲長爲高爲進退爲不果爲臭其於人也爲寡髮爲廣顙爲多白眼爲近利市三倍其究爲躁卦

巽爲木其位繼震春夏木氣方盛其德爲入木根著土入之象也爲風以其柔順也爲長女以坤一索得也不獨此耳木從繩則直巽柔而順故繩直亦巽也治木以工工亦巽也陰始生柔弱而色白亦巽也木根入土日升長而不覺長與高亦巽也巽懦者多疑進退不果亦巽也臭氣也木氣芳香入而无形亦巽也髮稀曰宣周禮半矩謂宣韓非云髮不待年而宣

人陰盛髮多額狹眼黑陽盛反是巽體陽多陰少故
宜髮廣額多白眼皆巽也陰隱而貪侵牟二陽富以
其鄰近利市三倍亦巽也陰性靜而善動上遇二陽
以柔權剛德之制也故其究爲躁卦非終于柔順也
○萬物至巽而甲盡脫故爲潔齊繩直齊象也白潔
象也近猶漸也市交易也利之爲物使人近而不覺
交易爲市者利不覺而浸多入市中行者亦不覺而
漸遠三倍三畫之象浸積至于三倍皆巽象也三變
成震故爲躁卦躁者巽之變象順變爲躁如乾馬之
純變爲駁也凡物有初中終震得初陽巽得初陰故

其卦皆有究象

坎爲水爲溝瀆爲隱伏爲矯輮輮上聲爲弓輪其於人也爲加憂爲心病爲耳痛爲血卦爲赤其於馬也爲美脊爲亟心爲下首爲薄蹄爲曳其於輿也爲多眚爲通爲月爲盜其於木也爲堅多心

坎外弱而中滿其象爲水故凡溝瀆皆坎也陷而能潛凡隱伏皆坎也險連自然故爲勞卦凡矯之使直輮之使曲皆勞象亦坎也矯爲弓輮爲輪亦坎也其於人也往來坎坎爲加憂坎中滿心病之象也坎爲耳而中實耳痛之象也在造化爲水在人身爲血血

色赤亦坎也。于馬爲美脊。爲亟心。以剛在中也。爲俛而下首。爲蹄薄而怯。以陰柔在上下也。爲曳牽之使進也。其于車輿也。爲多眚。壞行險而勞也。習險而亨。盈科而進。通亦坎也。月。水精。外暗內明。亦坎也。盜潛行。外貪中狠。亦坎也。其于木。堅而多心者。亦坎也。豈必爲水爲坎邪。

災在內曰眚。亦隱伏之象。故目病亦曰眚。物微鱗亦曰眚。素問云。金在志爲憂。水在志爲恐。恐甚于憂。故爲加憂。加憂卽心病也。艮三爻厲薰心。以互坎也。水藏在腎。開竅于耳。水恐傷腎。故爲耳痛。氣陽浮動而

顯血陰流注而幽血在人身如水在天地間故坎爲血卦赤本陽光南方火色一陽生于子當坎位而極于巳故坎爲赤而乾爲大赤也

離爲火爲日爲電爲中女爲甲冑爲戈兵其于人也爲大腹爲乾干卦爲鱉爲蟹駭爲羸羸爲蚌棒爲龜其於木也爲科上槁

離中虛而外陽故爲火日陽精故爲日陰麗于陽而生明故爲電坤再索于乾而得故爲中女不但此耳剛在外而虛甲冑亦離也火炎如鋒戈兵亦離也其於人也爲大腹坤在中也爲乾卦日能暄也爲鱉爲

蟹爲羸爲蚌。爲龜外剛內柔也。其於木也。爲科上槁。失潤而中空也。由此推之。何物无離邪。

坎爲血卦。水之潤也。離爲乾卦。火之燠也。火日電乾槁皆象其性之燥也。甲冑大腹蟹。蟹羸蚌龜皆象其形之外剛中柔也。蟹蟹中黃。內坤也。羸蚌殼能開閉。外乾也。羸形銳。蚌形刻。又善附麗。火象也。龜負卦。文象也。管子曰。龜生于水。發于火。以其灼之則靈也。張子厚曰。陰在中。虛科上槁。木中虛也。虛其形槁其性也。愚按。離本乾卦。互巽木。科上槁者。鳥鵲之巢。槁枝爲之。離麗爲宗。鳥窠之象。旅之離上九。爲鳥焚其巢。

取此

艮爲山爲徑路爲小石爲門闕爲果蓏標爲闔寺爲指

爲狗爲鼠爲黔虔喙會之屬其於木也爲堅多節

艮一陽據二陰之上起于地爲山然非獨山也山中有徑路達山頂者陰虛上通之象亦艮也山上小石堅確亦艮也防禦如門闕二陰在內洞虛出入亦艮也一陽在上象木實爲果二陰在下象草實爲蓏實成則止能始能終亦艮也闔以禁禦闔寺无生意亦艮也指能握固堅持多節亦艮也狗司守鼠依穴皆利嘴剛上亦艮也物堅忍則緝其口凡閉口无聲之

屬皆良也。其於木堅而多節，節能止，亦良也。由此推之，良豈獨山邪？

黔，鈴通鐵束物也。又箝通，良止之象。止則箝口不發聲，所以憤懣而生震也。蟲有鳴不以口者，考工記云：以脰鳴者，以注鳴者，以旁鳴者，以翼鳴者，以股鳴者，以胸鳴者，謂之小蟲之屬。鳴不以喙，故云箝喙。若今蟬蛙蟋蟀之類是也。故謙之良九二居中爲鳴謙，以腹鳴之象也。次鼠後，其爲小蟲尤明。其大則虎狗剛喙之類，亦黔喙也。又黔青黑，東北之色。凡象非一義耳。

兌爲澤爲少女爲巫爲口舌爲毀折爲附決其於地也
爲剛鹵曾爲妾爲羊

兌以柔見于重剛之上坎水上入而下不洩故爲澤
坤三索而得故爲少女女善媚悅者爲巫巫亦兌也
巫以口舌爲官兌上缺口舌之象陰在下爲股在中
爲大腹在上爲口舌兌金有聲故口舌亦兌也秋金
氣華稿稈之屬始可鑊刈故毀折亦兌也果蓏之屬
始可斷取故決附亦兌也決絕也附繫也剛鹵澤水
鹹濕之氣凝結而堅剛者水之死氣也坎絕于下澤
見于上其地不能生物但足以爲鹵耳此嚴凝之氣

亦兌也。又剛鹵粗莽之狀如履之兌象武人是也。少女從嫡爲妻亦兌也。牟柔媚而多聲亦兌也。

八卦之象雜取人物事理至纖細淺近者以見宇宙萬事萬物无往非卦无往非爻。諺云信手拈來頭頭是道。此易簡之旨不測之神。解者穿鑿隱僻失之愈遠。

荀爽有集九家易解。乾有爲龍爲直爲衣爲言。坤有爲牝爲迷爲方爲囊爲裳爲黃爲帛爲漿。震有爲王爲鶴爲鼓翼有爲楊爲鶴坎有爲宮爲律爲可爲棟。爲叢棘爲狐爲葵藜爲桎梏。離有爲牝牛艮有爲鼻。

爲虎爲狐。兌有爲常。爲輔頰質。諸爻象往往有合者。
并錄于此。

序卦

此亦夫子十翼之一。序卦者。序文王所演上下二篇諸卦次第之義也。

上篇

有天地然後萬物生焉。盈天地之間者唯萬物。故受之以屯。屯者盈也。屯者物之始生也。物生必蒙。故受之以蒙。蒙者蒙也。物之穉也。物穉不可不養也。故受之以需。需者飲食之道也。飲食必有訟。故受之以訟。訟必有衆起。故受之以師。師者衆也。衆必有所比。故受之以比。比者比也。比必有所畜。故受之以小畜。物畜然後有禮。故

受之以履履而泰然後安。故受之以泰。泰者通也。物不可以終通。故受之以否。物不可以終否。故受之以同人。與人同者。物必歸焉。故受之以大有。有大者不可以盈。故受之以謙。有大而能謙。必豫。故受之以豫。豫必有隨。故受之以隨。以喜隨人者。必有事。故受之以蠱。蠱者事也。有事而後可大。故受之以臨。臨者大也。物大然後可觀。故受之以觀。可觀而後有所合。故受之以噬嗑。嗑者合也。物不可以苟合而已。故受之以賁。賁者飾也。致飾然後亨。則盡矣。故受之以剝。剝者剝也。物不可以終盡。剝窮上反下。故受之以復。復則不妄矣。故受之以无妄。

有无妄然後可畜故受之以大畜物畜然後可養故受之以頤頤者養也不養則不可動故受之以大過物不可以終過故受之以坎坎者陷也陷必有所麗故受之以離離者麗也

二章之義詳見各卦下屢言不可終者易无終終則必變也受猶歸斯受之之受受其卦之來也彼卦下來此卦上往彼逆來歸此順往受受爲數往逆爲知來此六十四卦往來順逆之象亦卽所謂易逆數者也卦之錯爲八八義聖之成法也由周而前編次或異如夏易首艮商易首坤周至文王更演其序分上

下二篇。上篇首乾坤至坎離。凡三十卦。下篇首咸恆。至既濟未濟。凡三十四卦。卦皆兩兩相對。一正一倒。一順一逆。如需訟隨蠱咸恆家人睽蹇解困井之類。不但義理相因。象亦相承。皆以推明造化人事往來消息不窮之通。不測之神。夫子作傳。隨宜轉注。左右逢源。所謂言近指遠。不下帶而道存。故易非聖人不能作。亦非聖人不能序也。世儒妄謂序卦非易道精蘊。置而弗講。豈義理在人心有不同邪。不然。則罔而已矣。

序卦不列乾坤不言相受者。一陰一陽之道。不測之

神妙萬物而爲言者也。諸卦无一非乾坤。凡陽皆乾。凡陰皆坤。无弗受也。變而言天地者。乾坤之象爲諸卦父母也。屯有二義。盈者。屯聚之義。剛柔初交。天地絪縕。雷雨動蕩。充盈之象也。物之始生者。屈而未伸。草木句萌之象也。臨者大也。言凡臨皆大者之事。以大臨小曰臨。物大可觀如山。惟五嶽可觀。水惟河海可觀。人惟聖賢可觀。臨反爲觀。陽大在上。爲四陰之觀也。在上无可觀。則在下者散而去。故曰可觀而後合也。餘解見各卦下。

下篇

有天地然後有萬物有萬物然後有男女有男女然後有夫婦然後有父子有父子然後有君臣有君臣然後有上下有上下然後禮義有所錯夫婦之道不可以不久也故受之以恆恆者久也物不可以久居其所故受之以遯遯者退也物不可以終遯故受之以大壯物不可以終壯故受之以晉晉者進也進必有所傷故受之以明夷夷者傷也傷于外者必反其家故受之以家人家道窮必乖故受之以睽睽者乖也乖必有難故受之以蹇蹇者難也物不可以終難故受之以解解者緩也緩必有所失故受之以損損而不已必益故受

之以益益而不已必決故受之以夬夬者決也決必有
所遇故受之以姤姤者遇也物相遇而後聚故受之以
萃萃者聚也聚而上者謂之升故受之以升升而不已
必困故受之以困困乎上者必反下故受之以井井道
不可不革故受之以革革物者莫若鼎故受之以鼎主
器者莫若長子故受之以震震者動也物不可以終動
止之故受之以艮艮者止也物不可以終止故受之以
漸漸者進也進必有所歸故受之以歸妹得其所歸者
必大故受之以豐豐者大也窮大者必失其居故受之
以旅旅而无所容故受之以巽巽者入也入而後說之

故受之以兌兌者說也說而後散之故受之以渙渙者離也物不可以終離故受之以節節而信之故受之以中孚有其信者必行之故受之以小過有過物者必濟故受之以既濟物不可窮也故受之以未濟終焉

恆爲夫婦夫婦之終爲父母父母老而退居遯也長子壯而用事大壯也震以長男承乾所以爲大壯物壯乃能進晉進也晉與漸皆進而有辨漸之進先艮故進有所歸晉之進先大壯故進必有傷進極復入于地故繼以明夷日盈則昃也禍患迫切惟天屬者爲能相收故明夷之傷受以家人夫受益滿則必潰

也。陰來謂之遇。陽來謂之復。復如遠人復還。病者復
平。喜慶之辭。遇如遇于巷。遇于塗。不期其然而然。遭
際偶然之辭也。有其信者必行之。謂人自恃其信于
心。則其行必果。而過乎中。故曰。小過過者。經歷之名。
大過則超越非常。故必至于陷。小過猶或可濟。故受
以旣濟。餘解見各卦下。

雜卦

此亦夫子十翼之一。雜卦者，雜取六十四卦陳說其義，不拘二篇次第，所以明易道之變也。

乾剛坤柔。比樂師憂。臨觀之義，或與或求。屯見而不失其居。蒙雜而著。震起也。艮止也。損益盛衰之始也。大畜時也。无妄災也。萃聚而升，不來也。謙輕而豫，怠也。噬嗑食也。賁无色也。兌見而巽伏也。隨无故也。蠱則飭也。剝爛也。復反也。晉晝也。明夷誅也。井通而困相遇也。咸速也。恆久也。渙離也。節止也。解緩也。蹇難也。睽外也。家人內也。否泰反其類也。大壯則止。遯則退也。大有衆也。同

人親也革去故也鼎取新也小過過也中孚信也豐多故親寡族也離上而坎下也小畜寡也履不處也需不進也訟不親也大過顛也姤遇也柔遇剛也漸女歸待男行也頤養正也既濟定也歸妹女之終也未濟男之窮也夬決也剛決柔也君子道長小人道憂也

八卦之象始于羲聖夫子既說卦以述其象猶恐學者泥于八物故推而廣之以明象之多變也八卦之序演自文王夫子既序卦以明其義猶恐學者泥于序故錯而雜之以明序之多變也故曰易者變而已所謂不窮之通不測之神乾者陽之剛凡卦爻剛皆

乾也。坤者陰之柔。凡卦爻柔皆坤也。比者上下相親而樂也。師者將卒同懼而憂也。臨者陽下陰上有親就相與之義。觀者陽上陰下有期望相求之義。屯者物生初出未離其居也。蒙者昏雜未開其明自著也。震陽起于下也。艮陽止于上也。損極必益。益盛之始也。益極必損。衰之始也。大畜養士待時也。无妄非望之災也。萃聚于下而不往也。升進于上而不來也。謙者自視輕也。豫者人易怠也。噬嗑者齧而食也。賁者野素无色也。兌內剛而外柔。見其情以悅人也。巽外剛而內柔。隱其情以異物也。隨者順治无事。蠱者有事整

飭也。剥者陽消將盡如物去其皮而爛也。復者既爛復生也。晉者日升而爲晝明夷者日入而明傷誅猶傷也。井木出水而通困圍于中而相遇也。咸應之速也。恆久于道也。渙散之使離也。節制之使止也。解寬緩也。蹇急難也。睽踈而外也。家人親而內也。否泰通塞相反也。大壯陽進知止也。遯陰盛知退也。大有柔在上入歸者衆也。同人柔在下與人相親也。革變舊也。鼎器新也。小過小有所過也。中孚信在中也。豐隆茂而多事也。旅孤栖而親寡也。離陰麗于陽火炎上也。坎陽陷于陰水潤下也。小畜孤陰而寡也。履不處

而旋也。需有待而不進也。訟相違而不親也。大過者偏重而顛仆也。姤者剛忽遇柔也。漸者女長可歸而男下之。男少女待也。頤者觀所養而求正也。既濟者事已濟各得其所也。歸妹者女以嫁爲歸。歸則女之事終矣。未濟者中男不得與中女交。陰陽皆失位而窮也。夬決也。一決而柔盡矣。變爲純乾。君子道長。小人之憂也。此六十四卦名者。雜取而觀。善惡休咎各具一理。二篇次第皆可參伍。非必拘于序也。自訟以上五十六卦。兩兩雜陳。自大過以下八卦。正倒分析。序之而有理。雜之而不亂。易道无方。變動不窮。如此。

或疑大過以下爲錯簡。今觀歸妹未濟二卦。原不相對。而曰女之終。男之窮。終之以夬。復反于乾。歸于君子。小人。聖人憂患天下。自有深意。非錯簡也。

屯見而不失其居。言欲出而不失其處也。蒙雜而著。言雖處而不免于出也。屯如漢高之保關中。蒙如孔明之處隴中。想望曰妄。非所望而至者。惟災爲然。故以災言无妄。因九三爻辭釋之。以戒人之妄想也。人情好上不知止。故升曰不來。賁以文入山。有從儉之義。故曰无色。往來于中而不得通。謂之困。相遇猶相抵也。不通之意。井之巽。上爻主塞坎之下流。而坎水

乃上出塞而後通也。故井謂之通困之兌下爻主塞坎之上源而坎適在下遇塞所以爲困也。渙節皆水也。風以散之則離澤以渙之則止。解蹇皆險也。動而出乎險上則緩止而處乎險下則難。豐多故或作故舊解言豐盛則多故舊孤旅則寡親戚雷電交作則其氣盛山上有火則其明孤也。陽上陰下定位也。離陰居上坎陽居下者陰陽變化互藏其宅也。如人心之神降而爲液火中有水也。腎之精升而爲氣水中有火也。火以陰精附于陽而炎上水以陽神附于陰而流下。故曰離上坎下。小畜與大有皆一陰而大有

之一陰君也。故有衆小畜之一陰臣也。故寡履與需皆乾也。履以行爲義。故不處需以須爲義。故不進。雜卦自乾坤至咸恆亦三十卦。合上經之數。自咸恆至終亦三十四卦。合下經之數。是又有不雜者存。上經三十卦。雜下經十二卦于中。下經三十四卦。雜上經十二卦于中。所以爲雜也。

周易正解卷二十終時萬曆乙卯季夏京山郝氏家刻